


Stersili: leturas e giogus in sardu

Unu mengianu de contus e de ispàssiu custu mengianu in sa Biblioteca Comunali de Stersili. Dexi pipius e pipias de edadi intre 3 e 11 annus ant pigau parti cun grandu atenzioni a s'atòbiu organizau de is operadoras de su sportellu linguisticu e de sa biblioteca.



A pustis de s'èssiri presentaus e connotus, seus intraus illuegu aintru de is istòrias stravanadas de Silvia Borando, autora e editora de Minibombo chi fait libburus innui is personàgius funt prus che totu animalis e chi tenint sèmpiri unu finali abbristù e spiritosu.





Eus sceberau su libburu "Sa duda" ("Il dubbio"), chi is pipius connosciant gai in italianu, ma no in sardu, duncas est stétiu fàcili a sighiri su contu e a ddu cumprèndiri fintzas e po is chi non costumant a fueddai su sardu in domu. A pustis, is pipius ant sceberau "Portu una giarra in sa crapita" ("Ho un sasso nella scarpa"), po acabbai cun "Grande gatto piccolo gatto", letura in italianu a incuru de sa bibliotecària Veronica.





Eus sighiu cun una bella atividadi acapiada a su libburu "Sa duda" cun is materialis postus a disponimentu in su situ de sa domu imprentadora: si seus spassillaus arretalliendi e cumponendi is tres partis de su cocodrillu, dd'eus segau sa brenti e ddui eus fatu caminai is "amigus" animalis. In custa manera, is pipius ant a sighiri in domu a imbentai contus cun cussus personàgius chi, de seguru, ant a chistionai in sardu!

